

四庫全書

史部

欽定四庫全書

金史卷六十六

元中書右丞相總裁托克托等修

列傳第四

始祖以下諸子

勗

本名烏頁
子宗彥

威赫

宗室呼寶默

和卓

子布呼

果布

衷
本名緋哈

齊

本名素赫

珠嚕

呼寶哈

宗賢
本名阿嚕

達蘭 卞

本名鄂摩

膏

本名額哩埒

奕

本名三寶

愛寶

勗字勉道本名烏頁穆宗第五子好學問國人呼爲秀才年十六從太祖攻寧江州從宗望襲遼主於石輦鐸太宗嗣位自軍中召還與謀政事宗翰宗望定汴州受宋帝降太宗使勗就軍中徃勞之宗翰等問其所欲曰惟好書耳載數車而還女直初無文字及破遼獲契丹漢人始通契丹漢字於是諸子皆學之宗雄能以兩月

盡通契丹大小字而完顏希尹乃依倣契丹字製女直字女直既未有文字亦未嘗有記錄故祖宗事皆不載宗翰好訪問女直老人多得祖宗遺事太宗初即位復進士舉而韓昉輩皆在朝廷文學之士稍拔擢用之天會六年詔書求訪祖宗遺事以備國史命昉與耶律迪延掌之昉等採摭遺言舊事自始祖以下十帝總為三卷凡部族既曰某部復曰某水之某又曰某鄉某村以別識之凡與契丹往來及征伐諸部其間詐謀詭計一

無所隱事有詳有畧咸得其實自太祖與高麗議和凡女直入高麗者皆索之至十餘年索之不已勗上書諫曰臣聞德莫大於樂天仁莫先於惠下所索戶口皆前世姦宄叛亡烏春烏木罕阿哈阿克蘇木之裔先世綏懷四境尚未賓服自先君與高麗通聞我將大因謂本自同出稍稍款附高麗既不聽許遂生邊釁因致交兵久方連和蓋三十年當時壯者今皆物故子孫安於土俗婚姻膠固徵索不已彼固不敢稽留骨肉乖離誠非

衆願人情怨甚可愍者而必欲求為已有特彼我之蔽
非一視同仁之大也國家民物繁夥幅員萬里不知得
此果何益耶今索之不還我以強兵勁卒取之無難然
兵凶器戰危事不得已而後用高麗稱藩職貢不闕國
且臣屬民亦非外聖人行義不責小過理之所在不俟
終日臣愚以為宜施惠下之仁弘樂夫之德聽免徵索
則彼不謂已有如自我得之矣從之十五年為尚書左
丞加鎮東軍節度使同中書門下平章事預平宗磐之

難賜與甚多加儀同三司以皇叔祖字冠其銜勛皆力辭不受皇統元年撰定熙宗尊號冊文上召勛飲於便殿以玉帶賜之所撰祖宗實錄成凡三卷進入上焚香立受之賞賚有差制詔左丞勛平章政事奕職俸外別給二品親王俸僚舊制皇兄弟皇子為親王給二品俸宗室封一字王者給三品俸勛等別給親王俸皆異數也宴羣臣於五雲樓勛進酒稱謝帝起立宰臣進曰至尊為臣下屢起於禮未安上曰朕屈已待臣下亦何害

是日上及羣臣盡歡俄同監修國史進拜平章政事光
懿皇后忌辰熙宗將出獵勗諫而止熙宗獵於海島三
日之間親射五虎獲之勗獻東狩射虎賦上悅賜以佩
刀玉帶良馬能以契丹字為詩文凡游宴有可言者輒
作詩以見意時上日與近臣酣飲或繼以夜莫能諫之
勗上疏諫乃為止酒進拜左丞相兼侍中監修如故八
年奏上太祖實錄二十卷賜黃金八十兩銀百兩重綵
五十端絹百匹通犀玉鈎帶各一出領行臺尚書省事

召拜太保領三省領行臺如故封魯國王勗剛正寡言
海陵方用事朝臣多附之者一日大臣會議海陵後至
勗面責之曰吾年五十餘猶不敢後爾少年強健乃敢
如此海陵跪謝九年進拜太師進封漢國王海陵篡立
加恩大臣以收人望封秦漢國王領三省監修如故乃
宗本無罪誅勗髡鬚頓白因上表請老海陵不許賜以
玉帶優詔諭之有大事令宰臣就第商議入朝不拜勗
遂稱疾篤不言表請愈切海陵不憚從之以本官致仕

進封周宋國王正隆元年與宗室俱遷中都二年例降
封金源郡王薨年五十九撰定女直郡望姓氏譜及他
文甚衆大定二十年詔曰太師勗諫表詩文甚有典則
朕自即位所未嘗見其諫表可入寶錄其射虎賦詩文
等篇什可鏤板行之子宗秀

宗秀字實甫本名錫里庫涉獵經史通契丹大小字善
騎射與平宗磐宗雋之亂授定遠大將軍以宗磐世襲
明安授之宗弼復取河南宗秀與海陵俱赴軍前任使

宋將岳飛軍於毫宿之間宗秀率步騎三千扼其衝要
遂與諸軍迎擊敗之師還為太原尹改博索路統軍使
不受高麗遣使以土產獻却之入為刑部尚書改御史
中丞授翰林學士天德初轉承旨封宿國公賜玉帶歷
平陽尹昭義軍節度使封廣平郡王正隆二年卒官年
四十二是歲例降二品以上封爵改贈金紫光祿大夫
康宗敬僖皇后生楚王摩羅歡次室溫都氏生昭武大
將軍騰格徹次室布薩氏坐事早死生龍虎衛上將軍

威赫威赫亦作隈喝美髯鬚勇健有才畧從太祖伐遼
取寧江州戰珠赫店天眷二年授驃騎上將軍除德爾
伯森紉詳袞遷忠順軍節度使興平軍節度使天德二
年入為大宗正丞四年拜昭德軍節度使以兄摩囉歡
子和勒端哈濟穆昆餘戶授威赫上京路哲爾袞明安
所屬世襲穆昆改德昌軍節度使封廣平郡王正隆二
年例奪王爵改哈斯罕節度使再改忠順軍節度使大
定元年封宋國公為勸農使卒官年六十五

始祖兄弟三人博和哩之後實圖美都古魯訥別有傳
呼實默者哈斯罕人也父托卜嘉事遼為太尉呼實默
善漢語通契丹大小字勇而善戰高永昌據東京招哈
斯罕人衆畏高永昌兵彊且欲歸之呼實默不肯從召
其族人謀曰吾遠祖兄弟三人同出高麗今大聖皇帝
之祖入女直吾祖留高麗自高麗歸於遼吾與皇帝皆
三祖之後皇帝受命即大位遼之敗亡有徵吾豈能為
永昌之臣哉始祖兄阿庫納留高麗中呼實默自言如此

蓋自謂阿庫納之後云於是率其族屬部衆詣薩哈
烏珍降營於托輝山之下永昌攻之呼實默力戰不能敵
奔於薩哈及攻開州呼實默以糧餉給軍後攻保州
遼將以舟師遯呼實默邀擊敗之降其士卒賞賜甚厚
以為哈斯罕七部貝勒給銀牌一木牌三天輔二年卒
贈監門衛上將軍再贈驃騎衛上將軍子果實嘗從攻
顯州領四穆昆軍破魚梁務功最以其父所管十部為
哈斯罕達貝勒有和卓者亦稱始祖兄苗裔但不知與

呼實默相去幾從耳

和卓哈斯罕必勒哈水人也仕遼領辰復二州漢人渤海子富色克襲父職再遷靜江中正軍節度使佩金牌為哈斯罕女直部長子額哩頁與呼實默同時歸朝屢以糧餉助伐高永昌及高麗新羅後從宗望伐宋以功遷真定府路安撫使兼曹州防禦使佩金牌授必勒哈水世襲明安長子布呼識女直契丹漢字善騎射年十八宗弼選為章京從阿里富埒瑋追宋康王於明州睿

宗聞其才召置麾下從經畧山東河北陝西襲其父明
安授昭勇大將軍海陵伐宋以本明安兵從半道與南
征萬戶完顏福壽等俱亡歸謁世宗於遼陽世宗即位
除同知哈斯罕節度使事刑部侍郎色克為都統布呼
剌之坐擅署置官吏私用官中財物削兩階解職未浹
旬世宗獻享山陵兵部尚書克實昭毅大將軍鄂倫中
都同知完顏璋等謀反欲因上謁山陵舉事鄂倫與布
呼親舊與之謀議事具克實傳既知事不可成乃與克

實璋執鄂倫等上變克實不肯以始謀盡首遂并誅之而賞布呼璋除布呼濬州防禦使累遷順天軍節度使致仕卒年六十七

昭祖族人果布者從昭祖耀武於青嶺白山還至古哩甸昭祖得疾寢於村舍洞無門扉乃以車輪當門為蔽果布卧輪下為扞禦已而賊至刃交於輪輻間果布洞腹見膏恐昭祖知之乃然薪取膏以為炙問之以他肉對昭祖心知之遂中夜啟行

衷本名綽哈中都司屬司人世祖曾孫祖巴噶布琳封
鄆王父烏里官至特進大定中收充閤門祇候授代州
宣銳軍都指揮使歲旱州委禱雨於五臺靈潭步致其
水雨隨下人為刻石紀之四遷引進使兼典客署令改
尚輦局使扈從北幸賜廐馬二以旌其勤尋為夏國王
李仁孝封冊使歷寧海蠡州刺史入為大睦親府丞除
順義軍節度使陞辭賜金幣特寵異之移鎮鎮西泰和
六年致仕卒衷孝悌貞謹深悉本朝婚禮皇族婚嫁每

令衷相之治復有能稱其在寧海蠡州平賦役無擾民
立石頌遺愛大安初追贈輔國上將軍

齊本名素赫穆宗曾孫父哈布爾寧州刺史大定中以
族改充司屬司將軍授同知復州軍州事累遷刑部員
外郎上諭曰本朝以來未嘗有內族為六部郎官者以
卿歷職廉能故授之先是復州哈斯罕關地方七百餘
里因圍獵禁民樵捕齊言其地肥衍令賦民開種則公
私有益上然之為弛禁即牧民以居田收甚利因名其

地曰哈斯罕明安章宗立改戶部員外郎出為磁州刺史治以寬簡未嘗留獄屬邑武安有道士視觀宇不謹吏民為請鄰郡王師者代主之道士忿奪其利告王私置禁銅器法當徒縣令惡其為人反坐之具獄上齊審其誣又以王有德不忍坐之問同寮無以對齊曰道士同請即同居也當准首俱釋其罪其寬明大體皆此類也磁名郡刺史皆朝廷遴選郡人以前政有聲如劉徽柔程輝高德裕皆不及也河北提刑司以治狀聞明昌

三年始議置諸王傅頗難其選乃以齊傅亮王王將至任郡明安迎接齊峻却之王怪問故曰三國藩輔明安皆總戎職於王何利焉却之以遠嫌也王悅服王府家奴為不法輒發還本明安終更無敢犯者明年授山東東西路副統軍兼同知益都府事有惠愛郡人為之立碑轉彰化軍節度使六年移利涉軍召見勞慰有加詔留守上京承安二年致仕卒齊明法識治體所至有聲內族中與丞相承暉並稱云

珠嚕宗室子從鄭王烏色敗高麗於海蘭取雅魯城克
寧江州收黃龍府珠赫店之役達嚕噶城之役呼岱巴
岡之役皆力戰有功東京降為本路招安副使敗遼兵
破通古營蘇州漢民叛走珠嚕追復之以功為穆昆天
輔四年卒年四十一皇統中贈鎮國上將軍

呼實哈宗室子也從太祖攻寧江敗遼兵於達嚕噶城
破遼主親兵皆有功遼軍來援濟州呼實哈與其兄實
古納以兵迎擊敗之還攻濟州中流矢戰益力克其城

軍中稱其勇從攻春泰州降之并降境內諸部族其不
降者皆攻拔之遼主西走呼實哈追至中京獲其宮人
輜重凡八百有有薩納噶者復以本部叛去呼實哈以
兵五百追及之獲其親屬部人以還德州復叛呼實哈
以兵五千克其城從羅索擊敗敵兵二萬於歸化之南
并降歸化從取居庸關并燕之屬縣及其山谷諸屯伊
實部既降復叛去呼實哈引兵追及戰敗之俘獲甚衆
澤州諸部有逃者皆追復之又敗叛人於臨潢誅其酋

領而安撫其人民天眷二年遷永定軍節度使改武定軍徙汴京留守天德三年授世襲明安卒年六十八

宗賢本名阿魯太祖伐遼從攻寧江州臨潢府太宗監國選侍左右甚見親信臨潢復叛從宗望復取之為內庫都提點再遷歸德軍節度使政寬簡境內大治秩滿士民數百千人相率詣朝廷請留及改武定軍百姓扶老攜幼送數十里悲號而去改永定軍秉德廉訪官吏士民持盆水與鏡前拜言曰使君廉明清直類此民實

賴之東德曰吾聞郡僚廉能如一汝等以爲何如衆對曰公勤清儉皆法則於使君耳因謂宗賢曰人謂君善治當在甲乙果然賢使君也用是超遷兩階天德初授世襲穆昆馳驛召之雄州父老相率張青繩懸明鏡於公署老幼填門三日乃得去封定國公再除忠順軍節度使賜以玉帶捕盜司執數人至府宗賢問曰罪狀明白否對曰獄具矣宗賢閱其案謂僚佐曰吾察此輩必究不數日賊果得人服其明改海蘭路兵馬都總管歷

廣寧尹封廣平郡王改崇義軍節度使兼領北京宗室
事正隆例奪王爵加金紫光祿大夫改臨海軍大定初
遣使召之宗賢率諸宗室見於遼陽除同簽大宗正事
封景國公致仕起為博索路兵馬都總管復致仕卒

特進達蘭宗室子年十六事太祖未嘗去左右珠赫店
之役太祖欲親戰達蘭控其馬而止之曰主君何為輕
敵臣請效力即挺槍前手殺七人已而槍折騎士曳而
下者九人太祖壯之曰誠得此輩數十雖萬衆不能當

也及戰於達嚕噶城遼兵一千陣於營外太祖遣達蘭
往擊之達蘭衝出敵陣大敗其衆攻臨潢府春泰州中
西二京皆有功天輔六年授穆昆天會四年從伐宋屢
以功受賞明年再舉至汴宗望聞宋人會諸路援兵於
睢陽遣達蘭與阿里庫將兵二千往拒之敗其前鋒軍
三萬於杞縣又破三寨擒宋京東路都總管胡直孺南
路都統制隋師元及其三將并直孺二子遂取拱州降
寧陵復破二萬於睢陽進取亳州聞宋兵十萬且至會

宗望益兵四千合擊大敗之其卒二千陣而立馳之不
動即麾軍去馬擊之盡殪擒其將石瑱而還帥府嘉其
功賞賚優渥睿宗駐兵熙州分遣諸將畧地達蘭以軍
五百入六盤山十六寨降其官八十餘民戶四千獲馬
二千匹皇統中累加銀青光祿大夫天德初加特進授
世襲明安卒年六十五海陵遷諸陵於大房山以達蘭
嘗給事太祖命作石像置睿陵前

卞本名鄂摩上京司屬司人大定二年收充護衛積勞

授彰化軍節度副使入為都水監丞累遷中都西京路
提刑使徙知歸德府河平軍節度使王汝嘉奏下前在
都水監導河有勞除北京留守俄改知大興府事時有
言尚書左丞瓜爾佳衡在軍不法詔刑部問狀事下大
興府下輒令追攝上以為失禮杖四十久之乞致仕不
許拜御史大夫先是左司諫持嘉克們上言御史大夫
久闕憲紀不振宜選剛正疾惡之人肅清庶務上由是
用卞前時孫鐸賈鉉俱為尚書鉉拜參知政事而鐸再

任對賀客誦唐張在詩有鬱鬱意卞劾奏之鐸坐降黜
既而復申前請遂以金吾衛上將軍致仕薨

膏本名額哩埒隸上京司屬司大定十年以皇家近親
收充東宮護衛轉十人長授御院通進從世宗幸上京
會皇太子守國薨世宗以膏親密可委特命與滕王府
長史臺駟驛往護喪時章宗為金源郡王亦留中都且
命膏等保護諭之曰郡王遭此家難哀哭當以禮節之
飲食尤當謹視世宗還都遷符寶郎除吏部郎中章宗

即位坐與御史大夫唐古貢為壽犯夜禁奪官一階罷
明昌元年起為同知棣州防禦使事上書歷詆宰執帝
以小臣敢譏訕宰輔杖八十削一官罷之發還本明安
明年降授同知宣德州事召授武衛軍副都指揮使四
遷知大興府事轉左右宣徽使承安二年拜尚書右丞
出為泰定軍節度使移知濟南府卒

奕本名三寶隸瑪展賽音司屬司大定七年以近親充
東宮護衛十人長轉為尚廐局使章宗即位遷左衛副

將軍累遷右副都點檢兼提點尚廐局使諭旨曰汝非
有過人才第以久次遷授當謹乃職勿復有非違事使
朕聞之未幾坐廐馬瘦決三十承安二年改左司都點
檢兼職如舊俄授同簽大睦親府事卒奕為人貪鄙數
以賕敗帝愛其能治園塲故進而委信之

愛實宗室子好學問襲父北京路筈栢山明安聽訟明
決人信而愛之察廉能除彰國軍節度副使改上京留
守判官提刑司奏彰國軍治狀遷同知率賓路節度事

改歸德軍歷海邳二州刺史皆兼總押軍馬宋統領劉
文謙以兵攻宿遷愛實迎擊破之復破戚春夏興國舟
兵萬餘人斬夏興國于陣遷鎮國上將軍再賜銀幣為
元帥左監軍赫舍哩執中前鋒渡淮破寶應天長二縣
師還遷同知歸德府事改泗州防禦使丁母憂起復大
安二年改華州防禦使遷鎮南軍節度使貞祐二年改
知大名府充馬軍都提控歷橫海安化軍節度使充宣
差山東路左翼都提控尋知濟南府事徙沁南軍節度

使遷河南統軍使兼武昌軍節度使卒

贊曰金諸宗室自始祖至康宗凡八世獻祖徙居海古
勒水額訥格爾村再徙按春水世祖稱海古勒兄弟蓋
指其所居也完顏十二部皆以部為氏宣宗詔宗室皆
書姓氏然亦有部人以部為氏非宗室同姓者遂不可
辨矣

金史卷六十六

欽定四庫全書

金史卷六十七

元中書右丞相總裁托克托等修

列傳第五

錫磬

和諾克

牙薩克達

烏春

溫都布
拉附

拉必

牙瑪察

通恩

埒克

阿蘇

奚王和勒博

錫馨海蘭水烏凌阿部人昭祖以條教約束諸部錫馨
陸梁不可制及昭祖沒于巴剌濟村部人以柁歸至海
蘭水錫馨與完顏部鄂和出而邀諸路攻而奪之柁揚
言曰汝輩以嚕為能而推尊之吾今得之矣昭祖之徒
往告于佛穆丹與瑪竒嶺赫伯村完顏部蒙克巴圖等
募軍追及之與戰復得柁衆推景祖為諸部長白山赫圖
們扎蘭托卜古倫五國皆從服及遼使赫嚕林牙來
索逋人錫馨拒阻不聽命景祖攻之不能克景祖

自度不可以力取遂以詭計取之乃以錫馨阻絕海東
路請於遼遼帝使人讓之曰汝何敢阻絕鷹路審無他
意遣其酋長來錫馨使其長子頗克綽歡入朝曰不敢違
大國之命遼人厚賜遣還謂之曰汝父信無他宜
身自入朝錫馨信之明年入見於春蒐頗克綽歡從遼主
謂錫馨曰罪在汝不在汝子乃命頗克綽歡還而流錫
馨於邊地蓋景祖以計除錫馨而欲撫有其子與部人
也頗克綽歡蓄怨未發會哈勒琿水赫舍哩部拉必瑪

察叛頗克綽歡從之及敗於穆稜水瑪察遁去頗克綽歡與必拉就擒及其黨與皆獻之遼主久之世宗復使人言曰頗克綽歡不還則其部人自知罪重恐懼不肯歸服遼主以為然遂遣頗克綽歡及前後所獻罪人皆還之

和諾克薩克達兄弟者國相雅達之子也居完顏部伊敦村雅達稱國相不知其所從來景祖嘗以幣與馬求國相於雅達許之景祖得之以命肅宗後薩哈亦居是

官焉和諾克兄弟嘗事景祖世祖初季父伯赫有異志陰誘和諾克欲為亂昭肅皇后往伊敦村世祖肅宗皆從行遇和諾克薩克達各被酒紛爭遂舉刃相向后親解之乃止自是謀益甚是時烏春烏木罕亦與伯赫相結詭以鄂博台賣甲為兵端世祖不得已而與之和間數年烏春以其衆涉和倫拉林二水世祖親往拒之和諾克薩克達遂起兵肅宗以偏師拒和諾克薩克達世祖畏其合勢也戒之曰可和則和否則戰至烏魯斯哈

珠水既陣成列肅宗使富德貝勒議和和諾克亦恃烏
春之在北也無和意富德報肅宗曰敵欲戰或曰戰地
迫近村墟雖勝不能盡敵宜退軍誘之寬地肅宗感之
令軍少却未成列和諾克薩克達乘之肅宗敗焉和諾
克乘勝鈔畧是役也烏春以久雨不能前乃罷兵世祖
聞肅宗敗自將經舍琿特克兩水取和諾克薩克達之
家和諾克薩克達不知也焚其所居殺畧百許人而還
未至軍肅宗之軍又敗世祖至責讓肅宗失利之狀使

罕都伊克以本部七穆昆助之復請和和諾克薩克達
欲得英格之大赤馬希卜蘇之紫騮馬世祖不許遂與
博都哩部布呼富察部薩克蘇及混同江左右布克坦
水北諸部兵皆會厚集為陣鳴鼓作氣馳騁和諾克恃
其衆有必勝之心下令曰今天門開矣以爾車自隨凡
烏古龍夫婦寶貨財產恣爾取之有不從者俘畧之而
去於是摩多圖水費摩部鄂博貝勒附於世祖和諾克
等縱火焚之鄂博死世祖厚撫其家既定和諾克乃以

舊地還之和諾克軍復來富察部沙津貝勒呼卜圖貝勒使愛實間道來告且問曰寇將至何以待之世祖曰事至此不及謀矣以衆從之自救可也惟以旗幟自別耳每有兵至則輒遣愛實穿林潛來令與拜察往還大道即故潛行林中路也和諾克至北隘旬世祖將出兵聞伯赫食於圖們村死矣乃沿接春水行且欲并取海古勒珠爾蘇貝勒之衆而後戰覘者來報曰敵至矣世祖戒希卜蘇整軍速進使待於托果原當是時和諾克

兵衆世祖兵少衆寡不敵比世祖至軍士氣劬甚世祖
心知之而不敢言但令解甲少憩以水洗面飲麩水頃
之士氣稍蘇息是時肅宗求救於遼不在軍中將戰世
祖屏人獨與穆宗私語兵敗則就與肅宗乞師以報讐
仍令穆宗勿預戰事介馬以觀勝負先圖去就乃袒袖
韋弓服矢以緼袍下幅護前後心三揚旗三撾鼓棄旗
提劍當前鋒盡銳搏戰和諾克步軍以千盾進世祖之
衆以長槍擊之步軍大敗希卜蘇從後奮擊之和諾克

騎兵亦敗世祖乘勝逐北摩多圖水水為之赤世祖止
軍勿追盡獲所棄車甲馬牛軍實以戰勝告於天地頒
所獲於將士各以功為差未幾和諾克薩克達率屬來
降布呼猶保薩喇村招之不出薩克蘇據烏魯斯哈珠
村世祖遣人與之議和薩克蘇謾言為戲答之曰我本
欲和壯士巴特瑪不肯和泣而謂我曰若果與和則美
衣肥羊不可復得是以不敢從命遂縱兵俘畧隣近村
墅有人從道傍射之中口死布呼之屬曰舒魯舒魯之

母嫁於圖們部達爾歡貝勒而為之妾達爾歡與族兄弟茂賽音貝勒俱事世祖世祖欲間舒嚕於布呼謂達爾歡曰汝之事我不如茂賽音之堅固也蓋謂舒嚕母子一彼馬一此馬以此撼舒嚕舒嚕聞之遂殺布呼而降舒嚕通於布呼之妾常懼得罪及聞世祖言惑之使告於達爾歡曰將殺布呼而來汝待我於江伺布呼睡熟刺刃於胸而殺之追者急白日露鼻匿水中逮夜至江方游以濟達爾歡使人待之乃得免久之醉酒而與

達爾歡狠爭達爾歡殺之

烏春阿卜薩水溫都部人以鍛鐵為業因歲歉策杖負
擔與其族屬來歸景祖與之處以本業自給既而知其
果敢善斷命為本部長仍遣族人富德送歸舊部富德
烏春之甥也世祖初嗣節度使叔父伯赫陰懷覬覦間
誘和諾克薩克達及烏春烏木罕等烏春以伯赫居肘
腋為變信之由是頗貳於世祖而虐用其部人部人訴
於世祖世祖使人讓之曰吾父信任汝以汝為部長今

人告汝有實狀殺無罪人聽訟不平自今不得復爾為
也烏春曰吾與汝父等輩舊人汝為長能幾日干汝何
事世祖內畏伯赫恐羣朋為變故曲意懷撫而欲以婚
姻結其歡心使與約婚烏春不欲笑曰狗彘之子同處
豈能生育呼爾哈與女直豈可為親也烏春欲發兵而
世祖待之善無以為端爪爾佳部鄂博台亦鐵工也以
被甲九十來售烏春聞之使人來讓曰甲吾甲也拉林
水以南布克坦水以北皆吾土也何故輒取吾甲其並

以歸我世祖曰彼以甲來市吾與直而售之烏春曰汝不肯與我甲而為和解則使汝叔之子色克及色埒來色克蓋伯赫之子也世祖度其意非真肯議和者將以有為也不欲遣衆固請曰不遣則必用兵不得已遣之謂色埒曰色克無害彼且執汝矣半途辭疾勿往既行色埒曰我疾作將止不往色克曰吾亦不能獨往矣同行者強之使行既見烏春烏春與色克厚為禮而果執色埒曰得甲則生否則殺汝世祖與其甲色埒乃得歸

烏春自此益無所憚後數年烏春舉兵來戰道色辰嶺
涉和倫拉林水舍於珠格部阿勒哈村卓巴納具勒家
時十月大雨累晝夜不止冰漸覆地烏春不能進乃引
去於和諾克薩克達亦舉兵世祖自拒烏春而使肅宗
拒和諾克烏春遇雨歸遼叔父伯赫亦死故世祖得
併力於和諾克薩克達一戰敗之沃呼部人博諾舊事
景祖至是亦有他志徙於納巴克坦村遂以縱火誣罕
都欲因此除去之語在罕都傳中世祖獲博諾釋其罪

博諾終不自安徙居圖庫村與烏春烏木罕結約烏春
舉兵度嶺世祖駐軍溫開村待之進至蘇素海甸兩皆
陣將戰世祖不親戰命肅宗以左軍戰色埒默希卜蘇
助之徵異夢也肅宗束縵縱火大風從後起火熾烈時
八月野草尚青火盡燎烟焰漲天烏春軍在下風肅宗
自上風擊之烏春大敗復獲博諾獻於遼而城蘇蘇海
甸以據之赫舍哩拉必瑪察與世祖戰於野鵲水世祖
中四創軍敗拉必使吉遜圖罕等過青嶺見烏春賂諸

部與之交結拉必瑪察求助於烏春烏春以古哩甸兵
百十七人助之世祖擒拉必獻於遼主并言烏春助兵
之狀仍以不修鷹道罪之遼主使人至烏春問狀烏春
懼乃為調言以告曰未嘗與拉必為助也德里石之北
古哩甸之民所管不及此拉必既敗世祖盡得烏春古
哩甸助兵一百十七人使其卒長拉必烏爾圖往招其
衆繼遣薩布貝勒撫定之薩布不能撫富察部古實巴
克實等誘三百餘人入城盡陷之世祖治鷹道還色埒

默來告乃使罕都為都統破烏春烏木罕於實都古實
巴克實皆就擒世祖自將過沃濟嶺至烏木罕村和倫
瓜爾佳部襲寬貝勒烏雅部富哲固納請分一軍由所
部伐烏春蓋所部與烏春近欲以自蔽故也乃使色埒
默雅爾盤以支軍道其所居世祖自將大軍與罕都合
至阿卜薩水嶺東諸部皆會實圖美亦以所部兵來是
時烏春前死烏木罕聞知世祖來伐訴於遼人乞與和
解使者已至其家世祖軍至烏木罕請緩師盡以前所

納亡人歸之世祖使烏淩阿果多歡貝勒往受所遣亡者烏木罕以三百騎乘懈來攻世祖敗之遼使惡其無信不復為主和乃進軍圍之太祖衣短甲行圍號令諸軍烏木罕使托雲潛出城攻之托雲馳馬援槍已將及太祖和爾和擊斷其槍乃得免色埒默至色辰水用固納計取先在烏春軍者二十二人烏春軍覺之殺二人餘二十人皆得之益以土軍來助烏木罕自知不敵乃遁去遂克其城盡以資產分賚軍中以功為次諸部皆

安輯焉穆宗常嘉固納功後以色埒默之女守寧妻其子呼爾罕烏春之後為溫都氏裔孫曰布拉

溫都布拉始居長白山阿布繳河徙隆州額勒敏河布拉初從希尹征伐攝明安穆昆事遇賊突出力擊敗之手殺二十餘人用是擢修武校尉天德初充護衛遷宿直將軍與衆護衛射遠皆莫能及海陵以玉鞍銜賞之往海蘭路選可充護衛者使還稱旨遷伊囉幹羣牧使改遼州刺史正隆伐宋召為武翼軍副都總管將兵二

千至汝州南遇宋兵二萬餘邀擊敗之手殺將士十餘人是時嵩汝二州百姓多逃去布拉招集使之復其業改莫州刺史徵為太子左衛率府率再遷隴州防禦使歷鎮西呼爾哈顯德軍節度使致仕卒

拉必瑪察兄弟者哈勒琿水赫林鄉赫舍哩部人兄弟七人素有名聲人推服之及烏春烏木罕等為難故拉必兄弟乘此際結沁水之民勢寢不可制其同里中有避之者徙於必罕村野居女直中拉必怒將攻之乃約

烏庫哩部薩喇貝勒富哲達蘭呼實默貝勒和羅貝勒
溫綽歡貝勒和羅溫綽歡間使人告野居女直野居女
直有備拉必等敗歸拉必乃由南路復襲野居女直勝
之俘略甚衆和羅溫綽歡呼實默畏拉必求援於世祖
色埒默以輕兵邀拉必等於特默圖村敗之盡得所俘
拉必瑪察驅掠拉林水牧馬世祖至混同江與穆宗分
軍世祖自圖古勒津倍道兼行馬多乏皆留之路傍從
五六十騎遇拉必於野鵲水日已曛拉必兵衆世祖兵

少罕都鑿戰出入數四馬中創死者十數世祖突陣力戰中四創不能軍穆宗自額圖琿津渡江遇敵於巴喇密特水敵問為誰應曰罕都問者射穆宗矢著於弓箠是歲拉必瑪察使其徒吉遜圖罕及托迪剽取呼拉布灤牧馬四百及富哲尼堪之馬合七百餘匹過青嶺東與烏春烏木罕交結世祖自將伐之拉必等偽降還軍拉必復求助於烏春烏木罕烏木罕以古哩甸兵百有十七人助之拉必據穆稜水保固險阻錫磬子頗克綽

歡往從之世祖率兵圍之克其軍瑪察遜去遂擒拉必
及頗克綽歡獻之遼盡獲其兵使其卒長烏新烏爾圖
招其衆俾薩布撫定之復使鄂蘭哈瑪爾察穆稜水人
情募兵與薩布合語在烏春傳世祖既沒肅宗襲節度
使瑪察據哲克依水繕完營堡招納亡命杜絕往來者
恃屯水民為之助招之不聽乃使康宗伐之是歲白山
混同江大溢水與岸齊康宗自阿林岡乘舟至於刷水
舍舟沿刷水而進使太祖從東路取瑪察家屬盡獲之

康宗圍瑪察急太祖來會軍於是瑪察先亡在外其人
乘夜突圍遯去太祖曰瑪察之家蕩盡矣走將安歸追
之瑪察不知太祖急求已也與三騎來伺軍其一人墜
馬下太祖識之問狀其人曰我隨瑪察來伺軍彼走者
二人瑪察在焉瑪察與其人分道走太祖命呼嚕古追
東走者而自追西走者至哲克依水失瑪察不見急追
之得遺甲於路迹而往前至大澤潭瑪察棄馬入崔
葦大祖亦棄馬追及之與之挑戰烏庫哩壯士和爾和

乘馬來問曰此何人也太祖初不識瑪察佯應曰瑪察也和爾和曰今亦追及此人邪遂下馬援槍進戰瑪察連射和爾和和爾和中二矢不能戰有頃軍至圍之罕都射中瑪察首遂擒之無有識之者和爾和乃前扶其首而視之見其齒豁曰真瑪察也瑪察張目曰公等事定矣遂殺之太祖獻馘於遼

通恩阿爾本特克新水赫舍哩部人祖曰和囉奇父訥格納世為其部貝勒威準部人伊喇貝勒海罕貝勒暴

其族人完塔哈貝勒及諸弟烏呼赫烏都溫抄畧其家
及抄畧阿古爾貝勒家侵及訥格納所部穆宗使訥格
納以本部兵往治伊喇等行至蘇伯水輒募人為兵主
者拒之輒抄畧其人遂攻烏庫哩部達薩塔入穆魯密
斯罕城及烏色伊克來問狀止蘇伯水西諾木歡村訥
格納止蘇伯水東烏滿村訥格納雖款伏而不肯徵償
時甲戌歲十月也明年八月訥格納遜去烏色追而殺
之執其母及其妻子以歸而使通恩復其所

塔克圖們琿春水合流之地烏庫哩部人呼沙呼貝勒之子卓多琿春丞安春之呼沙呼之子也間誘烏遜烏塔兩部民作亂達薩塔通恩皆叛而與塔克卓多合兩黨揚言曰圖克坦部之黨十四部為一烏庫哩部之黨十四部為一富察部之黨七部為一凡三十五部完顏部十二而已以三十五部戰十二部三人戰一人也勝之必矣世祖降附諸部亦皆有離心當是時惟烏雅部色塔貝勒及圖們水溫特赫部阿勒巴貝勒薩克蘇貝

勒等皆使人來告難色埒達希布之子也先使其兄巴古拉來既而以其甲來歸阿勒巴等曰吾等必不從亂但乞兵為援耳穆宗使薩哈伐埒克使們圖琿伐達薩塔既而太祖以七十甲詣薩哈軍中道以四十甲與們圖琿實圖美之軍與們圖琿會於穆魯密斯罕城下而通恩將援埒克聞們圖琿之兵寡以為無備而未知實圖美之來會也欲先攻們圖琿們圖琿實圖美迎擊大破通恩穆魯密斯罕城遂降獲通恩達薩塔皆釋弗誅

太祖至薩哈軍明日遂攻破埒克城城中渠帥皆誅之
取其孥累貨產而還烏塔城亦撤守備而降埒克先在
遼烏塔已脫身在外由是皆未獲卓多亦詣普嘉努降
太祖釋之於是諸部皆安業如故久之埒克烏塔皆來
降

阿蘇錫馨水赫舍哩部人父阿哈貝勤事景祖世祖世
祖破烏春還阿哈率官屬士民迎謁於桑阿塔灤獻黃
金五斗世祖諭之曰烏春本微賤吾父撫育之使為部

長而忘大恩乃結怨於我遂成大亂自取滅亡吾與汝等三十部之人自今可以保安休息吾大數亦將終我死汝等當念我竭力以輔我子弟若亂心一生則滅亡如烏春矣阿哈與衆跪而泣曰太師若有不諱衆人賴誰以生勿為此言未幾世祖沒阿哈亦死阿蘇繼之阿蘇自其父時常以事來昭肅皇后甚憐愛之每至必留月餘乃遣歸阿蘇既為貝勒嘗與圖克坦部卓多貝勒爭長肅宗治之乃長阿蘇穆宗嗣節度聞阿蘇有異志

召阿蘇賜以鞍馬深加撫諭陰察其意趣阿蘇歸謀益甚乃斥其事復召之阿蘇不來遂以同部穆都哩貝勒等起兵穆宗自瑪竒嶺出兵攻之薩哈自和倫嶺往畧定珊沁錫馨兩路攻下通恩城穆宗畧阿齊呼水益募軍至阿蘇城是日辰巳間忽暴雨晦暄雷電下阿蘇所居既又有大光聲如雷墜阿蘇城中識者以謂破亡之徵阿蘇聞穆宗來與其弟達呼布往訴於遼遼人來止勿攻穆宗不得已留和卓貝勒守阿蘇城而歸金初亦

有兩和卓其一薩哈父贈韓國公其一守阿蘇城者後
贈特進云和卓以兵守阿蘇城者二年矣阿蘇在遼不
敢歸穆都哩乃降遼使復為阿蘇來穆宗聞之使烏凌
阿舒嚕濟師且戒和卓令易衣服旗幟與阿蘇城中同
色使遼使不可辨遼使至乃使富察部呼嚕貝勒密遜
貝勒與俱至和卓軍而軍中已易衣服旗幟與阿蘇城
中如一遼使果不能辨和卓詭曰吾等自相攻干汝何
事誰識汝之太師乃刺殺呼嚕密遜所乘馬遼使驚怖

走去遂破其城達呼布先歸殺之阿蘇聞穆宗以計却
遼使破其城殺達呼布復訴於遼遼使奚節度使伊里
來問狀且使備償阿蘇穆宗復使矩威圖塔水人偽阻
絕鷹路者而使布古德部節度使言於遼平鷹路非已
不可遼人不察也信之穆宗出畋於屯水謂遼人曰吾
平鷹路也遼人以為功使使來賞之穆宗盡以其物與
矩威圖塔之人而不復備償阿蘇遼人亦不復問阿蘇
在遼無所歸後二年使其徒德濟至生女直界上海蘭

甸人畏穆宗執而送之阿蘇遂終于遼及太祖伐遼底
遼之績告于天地而以阿蘇亡命遼人不與為言凡與
遼往復書命必及之天輔六年棟摩羅索畧定天德雲
內寧邊東勝等州獲阿蘇軍士問之曰爾為誰曰我破
遼鬼也

贊曰金之興也有自來矣世祖擒拉必頗克綽歡既獻
之遼以為功又曰若不遣還其部人疑懼且為亂階遼
人不察盡以前後所獻罪人歸之景祖止赫魯林牙止

通肯穆宗止遼使阿蘇城始終以鷹路誤之而遼人不
悟景祖有黃馬服乘如意景祖沒遼貴人爭欲得之世
祖弗與曰難未息也馬不可以與人遂割其兩耳謂之
禿耳馬遼貴人乃弗取其削平諸部則借遼以為已重
既獻而求之則市以為已重戰陣一良馬終弗與遼人
而遼人終不悟豈興亡有數蓋天奪其魄歟

奚與契丹俱起在元魏時號庫莫奚歷宇文周隋唐皆
號兵強其後契丹破走奚奚西保隆科其留者臣服于

契丹號東西奚厥後遼太祖稱帝諸部皆內屬奚圖珲
者古部族之號奚有其地號稱圖珲州又書作鐵驪州
奚有五世族世與遼人為昏姻附姓舒嚕氏中事具遼
史今不載奚有十三部二十八落一百一帳三百六十
二族甲午歲太祖破耶律色實諸將連戰皆捷奚鐵驪
王和勒博以所部降未幾遜歸于遼及遼主使使請和
太祖曰歸我叛人阿蘇降人和勒博迪里等餘事徐議
之久之遼主至鴛鴦渚都統杲襲之亡走天德和勒博

與遼大臣立秦晉國王耶律聶哱于燕京聶哱死蕭妃
權國事太祖入居庸關蕭妃自古北口出奔和勒博至
盧龍嶺遂留不行會諸奚吏民于雅里部僭稱帝改元
天復改置官屬籍渤海奚漢丁壯為軍太祖詔和勒博
曰聞汝脅誘吏民僭竊位號遼主越在草莽大福不再
汝之先世臣服于遼今來臣屬與昔何異汝與伊都有
隙故難其來伊都設有睚眦朕豈從之儻能速降盡釋
汝罪仍俾主六部族總山前奚衆還其官屬財產若尚

執迷遣兵致討必不汝赦和勒博不聽天輔七年五月和勒博南寇燕地敗於景薊間其衆奔潰耶律阿固齊及甥巴錦家奴伯特赫等殺之其妻阿古聞之自剄死先是蘇庫部人據克斯山奚路都統達蘭招之不服往討之托紐部衆扼險拒戰殺之殆盡至是蘇庫卓琳托紐三部所據十三巖皆討平之達嚕噶部節度使伊里已降復叛奚馬和尚討達嚕噶並五院司等諸部諸部皆降遂執伊里杖之一百其父及其家人先被獲者皆

還之初太祖破遼兵于達嚕噶城九百奚營來降至是和勒博死奚人以次附屬亦各置明安穆昆領之

贊曰庫莫奚契丹起于漢末盛于隋唐之間俱彊為隣國合并為君臣歷八百餘年相為終始奚有五大定間類族著姓有約囉氏伯特氏斡里氏穆濟氏吹氏

金史卷六十七

欽定四庫全書

史部

金史卷

六十八至
七十二

詳校官國子監祭酒臣覺羅吉善

內閣中書臣李彤覆勘

總校官舉人臣章維桓

校對官主事臣金光悌

謄錄監生臣范沅

欽定四庫全書

金史卷六十八

元中書右丞相總裁托克托等修

列傳第六

罕都

子默音

伊克

阿里布

固納

額爾古訥

芬徹

罕都完顏部人祖舒魯與昭祖同時同部同名交相得

誓曰生則同川居死則同谷葬土人呼昭祖為勇舒嚕
呼舒嚕為賢舒嚕初烏蘇展部有美女名博多和青嶺
東混同江舒舒水人掠而去生二女長曰達呼幼曰濟
色昭祖與舒嚕謀取之遂偕至嶺右炷火於箭端而射
舒舒水人怪之皆走險阻久之無所復見却還所居昭
祖及舒嚕以衆至攻取其貲產虜二女子以歸昭祖納
其一賢舒嚕納其一皆以為妾是時諸部不肯用條教
昭祖耀武于青嶺白山入于蘇伯扎蘭之地賢舒嚕佐

之也其後別去至景祖時舒魯之子噶順舉部來歸居
於按春水源庫堪山之南庫堪山者所謂和琳之地是
也罕都噶順子世祖初襲節度使而伯赫以屬尊蓄異
謀不可制諸部不肯受約束相繼為變罕都入與謀議
出臨戰陣未嘗去左右沃呀部人博諾自景祖時與其
兄弟俱居按春水之北及烏春作難博諾將與烏春合
間誘烏魯斯哈珠水居人與之相結欲先除去罕都會
其家被火陰約隸人布格蘇詭稱放火為罕都呼圖二

人使珠敦來謂世祖曰布格蘇來告曰前日之火罕都等縱之若不棄舊好其執縱火之人以來世祖疑之蘇爾噶勒貝勒曰博諾兄弟也豈以一二人之故而與兄弟構怨乎彼自取之又將尤誰不如與之便罕都被甲執戟而起曰彼為亂之人也若取太師兄弟則亦與之乎今取我輩我輩決不可往若必用戰當盡力致死穆宗曰壯哉罕都以我所見正如此耳贈罕都以馬曰戰則乘此衆皆稱善世祖乃往見博諾隔必喇水而與之

言曰布格蘇旣告縱火由罕都等謹當如約當先遣布格蘇來布格蘇至世祖於馬前殺之使博諾見之旣而聞之放火者博諾家人恩楚華善也博諾欲開此釁故以誣罕都云拉必瑪察與世祖遇于野鵲水日已曛惟從五六十騎罕都入敵陣鏖擊之左右出入者數四世祖中創乃止烏春烏木罕據哈勒琿水世祖旣許之降遂還軍於是薩喇貝勒富哲達蘭觀勝負不助軍而薩喇達蘭先曾與拉必瑪察合世祖欲因軍還而遂滅之

馳馬前進達蘭者貞惠皇后之弟也罕都下馬執轡而諫曰獨不念愛弟費揚古與弟婦乎世祖感其言遂止費揚古者漢語云幼弟也世祖母弟中穆宗最少故云然穆宗德罕都言後以達蘭女克爾森妻其子古新太祖追瑪察罕都射中其首獲之遼人命穆宗太祖希卜蘇罕都俱為詳袞烏新烏爾圖以古哩甸兵來歸使薩布貝勒撫定之富察部古實巴克實等誘其衆入城陷三百餘人罕都為都統往治薩布失軍之狀盡解薩布

所將軍大破烏春烏木罕於實都擒古實巴克實初頁
赫水納哈塔部薩巴之弟曰安扎與人爭部族官不得
直遂來歸安扎之甥曰薩必曰薩塔希卜蘇破烏春烏
木罕城獲薩必薩塔并獲其母以為次室撫其二子薩
塔告安扎必為變不信而殺之薩塔臨刑歎曰日後必
當知之至是安扎果為變因穆宗晨出獵糾率七八人
操兵入宅奪據寢門刼貞惠皇后及家人等罕都入見
安扎曰汝輩所謀之事奈何閨門眷屬豈足以刼質徒

使之驚恐耳汝固識我盍以我為質也再三言之安扎從之貞惠皇后於是得解而質罕都而薩哈希卜蘇使人告急於獵所穆宗亦心動罷獵歸中途逢告者日午至安扎謂穆宗曰可使係案女直知名官僚相結送我兄弟親屬由咸州路入遼國庫金廐馬與我勿惜罕都亦當送我至遼境然後還而要穆宗與之盟穆宗皆從之遂執罕都及阿勒坦阿喇卜丹等七人共以衣裾相結與安扎俱行至遼境乃釋罕都罕都至濟州實黃龍

府使人馳驛要遮安扎之黨屬惟縱其親人使去遂殺
薩必并其母遣使報於遼乞還安扎遼人流之和勒端
城其後安扎懷思鄉土亡歸附于係察女直因亂其官
僚之室捕之不伏乃見殺穆宗襲位之初諸父之子錫
林錫伯及諸兄有異言曰君相之位皆渠輩為之奈何
罕都曰汝輩若紛爭則吾必不默默但已衆聞之遂帖
然自是不復有異言者罕都事四君出入四十年征伐
之際遇敵則先戰廣廷大議多用其謀世祖嘗曰吾有

罕都則何事不成肅宗時委任冠於近僚穆宗嗣位凡圖遼事皆專委之康宗以為父叔舊人尤加敬禮多所補益康宗十一年癸巳二月得疾避疾於默勒們水薨年六十三喪歸康宗親迓於路送至其家親視葬事天會十五年追贈儀同三司代國公明昌五年贈開府儀同三司諡曰忠敏子古新默音古新別有傳默音當安扎之難曾從罕都代為質後與宗峻俱侍太祖宗峻坐默音上上怒命坐其下貝勒拉巴哩博克順希卜蘇三

人爭千戶上曰汝輩能如罕都父子有勞於國者乎乃命默音為千戶三人者皆隸焉其眷顧如此天輔五年十二月卒天會十五年贈太子少傅

伊克系出景祖居舍音水完顏部為其部貝勒與同部人已哩貝勒鄂敏水富察部歡托和貝勒蘇都貝勒特克新特布水完顏部安圖貝勒圖卜穆爾水溫特赫部和囉海貝勒俱來歸金自此並大肅宗拒和諾克已再失利世祖命罕都伊克以本部穆昆之兵助之伊克與

罕都常在世祖左右居則與謀議出則蒞行陣未嘗不
在其間天會十五年贈銀青光祿大夫明昌五年贈特
進諡忠濟與代國公罕都特進和卓開府儀同三司博
諾儀同三司巴達俱配享世祖廟廷伊克子阿里布固
納額爾古訥薩克達薩克達子芬徹

阿里布伊克之子為人魁偉多智略勇於戰未冠從軍
下咸州東京遼人來取海州從貝勒瑪奇往援道遇重
敵力戰斬首千級從烏楞古攻豪懿州以十餘騎破敵

七百進襲遼主阿里布徇北地招降營帳二十四民戶
數千時已下西京棟摩攻應州未下退營於州北十餘
里夜遣阿里布率兵四百伺敵城中果出兵三千來襲
阿里布道與之遇斬首百餘獲馬六十後遼兵三萬出
馬邑之境以千兵擊之斬其將於陣天會初宋王宗望
討張覺於平州聞應州有兵萬餘來援遣阿里布與阿
勒達迎擊之斬馘數千而還復從其兄約罕率兵三千
攻乾州約罕道病卒代領其衆至乾州降其軍及營帳

三十獲印四十與布呼攻下義州宗望伐宋與郭藥師戰于白河宗望命阿里布以二穆昆先登奮戰賞賚特異至汴破淮南援兵斬其二將大軍退次孟陽姚平仲夜以重兵來襲阿里布適當其中力戰敗之既還聞大名開德合兵十餘萬來爭河至河上知去敵尚遠乃以輕兵夜發詰旦至衛縣遇敵斬首數千級餘皆潰去師次邢州漳沱橋已焚阿里布先以偏師營于水上比軍至而橋成宗望嘉其功出真定庫物賞之為長勝軍千

戶及再伐宋從宗望破敵於井陘遂下欒城師自大名
濟河阿里布屯於洺州之境時康王留相州大名府以
兵來攻我營阿里布乘夜以騎二百潛出其後反擊敗
之居數日敵復來蘇統制以兵二萬先至阿里布乘其
未集以三百騎出戰大敗其衆生擒蘇統制殺之大軍
旣克汴京攻洺州敗大名救兵遂下洺州從達蘭攻恩
州還洺人復叛阿里布先至城下城中出兵來戰敗之
執其守佐遂與富埒瑄取信德軍梁王宗弼取開德阿

里布以步兵五千赴之大名境內多盜命阿里布留屯其地賊犯莘縣聞阿里布至即潰去追襲一晝夜至館陶及之皆俘以歸從宗弼襲康王旣渡淮阿里布以兵四千留和州總督江淮間戍將以討未附郡縣遂攻下太平州隲其城廬州叛以偏師討之敗其騎六千擒三校明日復破敵二萬於慎縣斬首五百張永合步騎數萬來戰阿里布兵止二千敵圍之阿里布潰圍力戰竟敗之追殺四十里獲馬三百而還再攻廬州與達呼布

敗敵萬衆於拓臯至廬州騎兵五百出戰敗之斬其二
校師還宗弼趨陝西道聞大名復叛遣阿里布經略之
獨與譯者至城下招之大名果降翌日下令民間兵器
悉上送官於是吏民按堵如故為大名開德路都統齊
國建阿里布屯兵於汴城外天會十五年詔廢齊國已
執劉麟阿里布先入汴京備變明年除歸德尹割河南
地與宋入為燕京內省使宗弼復河南阿里布先濟河
撫定諸郡再為歸德尹河南路都統宋兵來取河南地

宗弼召阿里布與許州韓常潁州大臬陳州持嘉暉皆會于汴阿里布以敵在近獨不赴而宋將岳飛劉光世等果乘間襲取許潁陳三州旁郡皆響應其兵攻歸德者阿里布連擊敗之復取亳宿等州河南平阿里布功最皇統五年為行臺參知政事授世襲明安兼哈濟穆昆改元帥右監軍博索路統軍歸德軍節度使累階儀同三司其在汴時嘗取官舍材木構私第於恩州至是事覺法當議勲議親海陵嘗在軍中惡阿里布詔曰若

論勲勞更有過於此者況官至一品足以酬之國家立法貴賤一也豈以親貴而有異也遂論死年五十五阿里布以將家子從征伐屢立功歷官有惠愛得民心及死人皆惜之大定三年贈儀同三司詔以其子為右衛將軍襲明安及親管穆昆賜銀五百兩重綵二十端絹三百匹

固納伊克子善騎射有才幹從討和諾克薩克達烏春烏木罕埒克之叛皆有功太祖伐遼固納從戰寧江州

珠赫店破遼主親軍皆以力戰受賞襲其父穆昆領秦
王宗翰千戶攻下中西兩京宗翰伐宋圍太原未下宗
翰還西京固納以右翼軍佐尼楚赫守太原是時汾州
團柏榆次嵐憲潞皆有兵來援固納凡四戰皆破之大
軍圍汴固納引萬戶軍屢敗其援兵憲潞等州復叛固
納引兵復取之并收撫保德火山而還後領軍鎮夏邊
在職十二年天會八年授世襲明安天眷初為天德軍
節度使致仕累遷開府儀同三司卒年八十五子喜格

襲明安加宣武將軍

額爾古訥伊克子姿質魁偉年十四隸宗翰軍中常領
兵行前為偵候及大軍襲遼主額爾古訥以甲騎六十
追遼招討圖善獲之又以七騎追獲遼公主額布勒以
獻有軍來為遼援方臨陣中有躍馬而出者軍帥謂之
曰能為我取此乎額爾古訥曰諾果生擒而還問其名
曰通古蓋北部中勇者也額爾古訥善馳驛日能千里
及伐宋屢遣將命以行天會八年從秦王在燕聞伊都

反於西北秦王促令額爾古訥馳驛以往黎明走天德
及至日猶未曛也皇統元年以功授寧遠大將軍哈喇
唐古部節度使五年授千戶六年遷西北路招討使九
年再遷天德尹西南路招討使天德二年召見四年遷
臨洮尹加金紫光祿大夫卒官年五十三

芬徹自上京密齊顯河徙屯天德初為元帥府章京奉
使皆稱職按事能得其實領明安皇統間除同知開遠
軍節度使斥候嚴整邊境無事正隆初為中都路兵馬

判官是時京畿多盜芬徹捕得大盜四十餘人百姓稍
安改安化軍節度副使大定二年領行軍萬戶充邳州
刺史知軍事領本州萬戶管所屯九明安軍昌武軍節
度使山東副都統薩哈南征元帥府以芬徹行副統事
入為太子少詹事再遷開遠軍節度使襲伯父固納明
安歷博索路兵馬都總管西北路招討使卒芬徹性廉
潔忠直臨事能斷凡被任使無不稱云

贊曰賢舒魯與昭祖為友罕都事景祖世祖為之臣盖

金自景祖始大諸部君臣之分始定故傳異姓之臣以罕都為首伊克雖宗室與罕都同功故列敘焉

金史卷六十八

欽定四庫全書

金史卷六十九

元中書右丞相總裁托克托等修

列傳第七

太祖諸子

宗雋 本名額爾袞 宗傑 本名穆里延

宗強 本名阿魯 爽 本名阿林

克實 阿蘇

宗敏

本名阿里布元

本名常勝子育

太祖聖穆皇后生景宣帝豐王烏里趙王宗傑光懿皇
后生遼王宗幹欽憲皇后生宋王宗望克王宗雋瀋王
額魯宣獻皇后生睿宗懿王鄂爾多元妃烏庫哩氏生
梁王宗弼衛王宗強曹王宗敏崇妃蕭氏生紀王實訥
埒息王寧吉莒王燕孫娘子特訥克生鄴王幹琿宗幹
宗望宗弼自有傳

宗雋本名額爾袞天會十四年為東京留守天眷元年

入朝與左副元帥達蘭建議以河南陝西地與宋俄為
尚書左丞相加開府儀同三司兼侍中封陳王二年拜
太保領三省事進封克國王既而以謀反誅

宗傑本名穆里延天會五年薨天會十三年謚孝悼天
眷元年追封越王以其長子奭為會寧牧封鄧王後為
上京留守再改燕京西京皇統三年薨子阿蘭達蘭海
陵為相將謀弒立構而殺之海陵篡立并殺宗傑妻大
定間贈宗傑太師進封趙王

宗強本名阿嚕天眷元年封紀王三年代宗固為燕京
留守封衛王太師皇統二年十月薨輟朝七日喪至上
京上親臨哭之慟仍親視喪事子阿林克實阿蘇

爽本名阿林天德三年授世襲明安正隆二年除橫海
軍節度使改安武軍留守司奉朝請海陵將伐宋嚴酒
禁爽坐與弟阿蘇及從父兄亨圖克坦貞會飲被杖下
遷歸化州刺史奪明安未幾復除安武軍節度使海陵
渡淮分遣使者剪滅宗室爽憂懼不知所出會世宗即

位東京宗室璋推爽弟阿蘇行中都留守遣人報爽爽
棄妻子來奔與弟忻州刺史克實俱至中都東迎車駕
至梁魚務入見世宗大悅即除殿前馬步軍都指揮使
封溫王改祕書監母憂尋起復遷太子太保進封壽王
頃之世宗第五女蜀國公主下嫁唐古鼎賜宴神龍殿
謂爽曰朕與卿兄弟在正隆時朝夕常懼不保豈意今
日賴爾兄弟之福可以享安樂矣爽泣下頓首謝未幾
判大宗正事太子太保如故爽有疾詔除其子符寶祗

候色埒為忠順軍節度副使爽入謝上曰朕以卿疾使卿子遷官冀卿因喜而愈也色埒年少未閑政事卿訓以義方便有善可稱別加陞擢爽疾少間將從上如涼陁賜錢千萬進封英王轉太子太傅復世襲明安進封榮王改太子太師顯宗長女鄴國公主下嫁烏庫哩誼賜宴慶和殿爽坐西向迎夕照面發赤似醉上問曰卿醉邪對曰未也臣面迎日色非酒紅也上悅顧羣臣曰此弟出言未嘗不實自小如此因謂顯宗兄弟曰汝等

可以為法以爽貲用有闕特賜錢一萬貫二十三年爽疾久不愈敕有司曰榮王告滿百日當給以王俸既薨上悼痛輟朝遣官致祭賻銀千兩重綵四十端絹四百匹陪葬山陵親王百官送葬他日謂大臣曰榮王之葬朕以不果親送為恨其見友愛如此

克實以宗室子累官唐古部族節度使降忻州刺史海陵遣使將殺之克實聞世宗即位棄州來歸與其兄歸化州刺史阿林會于中都是時弟阿蘇權中都留守事

克實謂阿林曰阿蘇愚戇恐不能撫治欲少留以助之
阿林乃行克實留中都聞世宗發東京乃迎見于瑪奇
鋪除兵部尚書佩金牌將兵往東京行至中都聞南京
已定遂止克實材武過人狠戾好亂自以太祖孫頗有
異志世宗初至中都恠惚多事扈從諸軍未暇行賞或
有怨言昭武大將軍鄂倫正隆末被詔佩金牌取河南
兵四百人監完顏古雲軍于歸化次彰德會通吉和尚
持大定赦文至和尚使人招之鄂倫不聽率兵來迎和

尚亦以所將佛寧兵列陣待之鄂倫兵皆不肯戰遂請
降和尚邀之入相州收其甲兵置酒相勞鄂倫托腹疾
不肯飲至夜已張燈時時出門與其心腹密謀欲就執
和尚稍具弓矢和尚覺之佯為不知使其從者迫而伺
之鄂倫不得發上至中都近郊鄂倫上謁上亦撫慰之
鄂倫自嫌初無降志及河南統軍司令史鄂爾多為人
狡險意圖事鄂倫取兵于河南統軍使圖們額哩頁鄂
爾多與俱來俱不自安同知延安尹李惟忠與熙宗弒

逆構殺韓王亨世宗疎斥之同知中都留守璋初自領其職因而授之完顏布呼為副統以罪解職居京師於是克實鄂倫李惟忠鄂爾多璋布呼謀欲因扈從軍士怨望作亂鄂倫曰押軍明安阿古喇必不違我惟忠曰惟忠嘗為神翼軍總管有兩銀牌尚在可以矯發內藏賞士萬戶高松與我舊必見聽衆曰若得此軍舉事無難矣鄂倫往約阿古喇阿古喇從之惟忠往說高松高松不聽語在松傳大定二年正月甲戌上謁山陵克實

中道稱疾而歸乙亥夜召鄂倫惟忠鄂爾多璋布呼會其家阿古喇以兵赴之璋曰今不得高松軍事不可成矣克實璋布呼乃擒鄂倫惟忠鄂爾多阿古喇詣有司自首既下詔獄克實不肯自言其始謀及與鄂倫面質然後款伏上念兄弟少太祖孫惟數人在惻然傷之詔罪止克實一身其兄弟子孫皆不緣坐遂誅鄂倫惟忠鄂爾多阿古喇等其阿古喇下穆昆士卒皆釋之除璋彰化軍節度使布呼濟州防禦使辛巳詔天下是日賜

扈從萬戶銀百兩明安五十兩穆昆絹十匹甲士絹五匹錢六貫伊勒希以下賜各有差

阿蘇宗強之幼子也長身多力天德二年以宗室子授奉國上將軍累加金吾衛上將軍居於中都海陵伐宋以左衛將軍富察薩勒扎同知中都留守事佩金牌守管齋世宗即位東京阿蘇與璋率守城軍官烏凌阿實嘉努等入留守府殺薩勒扎府判穆延薩里罕衆以阿蘇行留守事璋自署同知留守事即遣穆昆實嘉努烏

凌阿愿富察芬徹大興少尹李天吉子磐等奉表東京
大定二年授橫海軍節度使賜以名鷹詔曰卿方年少
宜自戒慎留心政事改武定軍以母憂去官起復興平
軍節度使賜以襲衣廐馬遷廣寧尹坐賊一萬四千餘
貫詔杖八十削兩階解職入見于常武殿上曰朕謂汝
有才力使之臨民今汝在法當死朕以親親之故曲為
全貸當思自今戒懼勿復使惡聲達于朕聽改平涼濟
南尹卒官年三十七上命有司致祭賻銀千兩重綵四

十端絹四百匹

宗敏本名阿里布天眷元年封邢王皇統三年為東京留守拜左副元帥兼會寧牧進拜都元帥兼判大宗正事再進太保領三省事兼左副元帥領行臺尚書省事封曹國王海陵謀弑立畏宗敏屬尊且材勇欲構誣以除之時熙宗屢殺大臣宗敏憂之謂海陵曰主上喜殘殺而國家事重柰何宗敏言時適左右無人海陵將以此為指斥構害之自念無證不可發乃止及弑熙宗使

葛王召宗敏葛王者世宗初封也宗敏聞海陵召疑懼不敢往葛王曰叔父今不即往至明日如何與之相見宗敏入宮海陵欲殺之尚猶豫以問左右烏達曰彼太祖子也不殺之衆人必有異議不如除之乃使布薩呼圖殺之呼圖刃擊宗敏宗敏左右走避膚髮血肉狼藉遍地葛王見殺宗敏問於衆曰國王何罪而死烏達曰天許大事尚已行之此蟣蝨爾何足道者天德三年海陵追封宗敏為太師進封爵妃富察氏進國號封子薩

哈連舒國公賜名褒進封王阿里罕封密國公正隆六年契丹薩巴反海陵遣使殺諸宗室阿里罕遂見殺大定間詔復官爵

昨王元景宣皇帝宗峻子也本名常勝為北京留守弟扎拉為安武軍節度使皇統七年四月戊午左副點檢富察阿固岱子尚主進禮物賜宴便殿熙宗被酒酌酒賜元元不能飲上怒仗劍逼之元逃去命左丞宗憲召元宗憲與元俱去上益怒是時戶部尚書宗禮在側使

之跪手殺之海陵與唐古辯謀廢立海陵曰若舉大事誰當立者海陵意謂已乃太祖長房之孫當立而辯與秉德初意不在海陵常勝乃熙宗之弟辯荅曰無胙王常勝乎海陵復問其次辯曰鄧王子阿蘭海陵曰阿蘭屬疎由是海陵謂胙有人望不除之將不得立故心忌常勝并阿蘭是時阿蘭方為奉國上將軍河南軍士孫進自稱皇弟按察大王熙宗疑皇弟二字或在常勝也使塔斯鞠之無狀塔斯乃嘗疑海陵與唐古辯時時竊

議告之悼后者海陵知熙宗有疑常勝心因此可以除之謂熙宗曰孫進反有端不稱他人乃稱皇弟大王陛下弟止有常勝扎拉塔斯鞠不以實故出之矣熙宗以為然使唐古辯蕭肄按問塔斯塔斯自誣服故出常勝罪於是乃殺常勝及其弟扎拉并殺塔斯海陵乘此并擠阿蘭殺之阿蘭弟達蘭熙宗本無意殺之海陵曰其兄既已伏誅其弟安得獨存又殺之熙宗以海陵為忠愈益任之而不知其詐也海陵篡立追封常勝扎拉阿

蘭官爵親臨葬所致祭大定十三年六月丁巳世宗召
皇太子諸王侍食于清輝殿曰或稱海陵多能何也海
陵謫詐睢盱殺人空虛天下三分之二太祖諸孫中惟
胙王元天性賢者也元子育本名和卓大定二十七年
自南京副留守遷大宗正丞兼勸農副使上問宰臣曰
和卓為人如何平章政事襄參政宗浩對曰為人清廉
幹治上曰乃父亦然又曰費揚古胙王元外若愚訥臨
事明敏過人朕於兄弟間於元尤款密

贊曰太祖躬擐甲冑以定國家舉無遺策而諸子勇略材識足以遂父之志傳及太宗而諸孫享其成矣

金史卷六十九

欽定四庫全書

金史卷七十

元中書右丞相總裁托克托等修

列傳第八

薩哈

宗憲

本名阿蘭

希卜蘇

宗亨

本名托卜嘉

宗賢

本名色哩

實圖美

忠

本名都古嚕訥

實實

思敬

本名薩哈

薩哈者景祖孫韓國公和卓之長子世祖之兄子也和卓於次最長景祖方計定諸部愛世祖膽勇材畧及諸子長國俗當異宮居而命和卓與世祖同邸和卓專治家務世祖主外事世祖襲節度使越噶順而傳肅宗穆宗皆景祖志也穆宗初襲位念和卓長兄不得立遂命薩哈為國相穆宗履藉父兄趾業鋤除彊梗不服己者使薩哈取瑪奇嶺道攻阿蘇穆宗自將期阿蘇城下會軍薩哈行次阿卜薩水烏雅部色埒貝勒來謁謂薩哈

日聞國相將與太師會軍阿蘇城下此為深入必取之策宜先撫定珊沁錫馨之路落其黨附奪其民人然後合軍未晚也薩哈從之攻通恩城請濟師穆宗與之薩哈遂攻下通恩城而與穆宗來會阿蘇城下通恩在南阿蘇在北穆宗初遣薩哈分道即會攻阿蘇聞其用色埒計先取通恩城與初議不合頗不然之及遼使來止勿攻阿蘇然後深以先取通恩城為功也及以國相都統討埒克卓多烏塔等軍而阿蘇亡入于遼終不敢歸

埒克卓多烏塔通恩皆降康宗既沒太祖稱達貝勒與薩哈分治諸部必塔水以北太祖統之拉林水人民薩哈統之明年甲午嗣節度命方至遼主荒于遊畋政事怠廢太祖知遼可伐遂起兵九月與遼人戰于界上獲色實太祖使告克于薩哈賜以所獲色實乘馬薩哈及將士皆驩呼曰義兵始至遼界一戰而勝滅遼必自此始矣遣子宗翰及完顏希尹來賀捷因勸進太祖未之從也十月師克寧江州破遼師十萬于鴨子河師還十

二月太宗及薩哈希卜蘇率諸將復勸進收國元年正月朔太祖即位薩哈行國相如故伐遼之舉決於都古嚕訥其大計實自薩哈啓之薩哈自以宗室近屬且長房繼肅宗為國相既貴且重故身任大計贊成如此諸人莫之或先也太祖即位後羣臣奏事薩哈等前跪上起泣止之曰今日成功皆諸君協輔之力吾雖處大位未易改舊俗也薩哈等感激再拜謝凡臣下宴集太祖嘗赴之主人拜上亦荅拜天輔後始正君臣之禮焉七

月太宗為安班貝勒授薩哈古倫貝勒希卜蘇愛滿貝勒果古倫齋貝勒所謂貝勒者蓋女直之尊官也太祖自正位號凡半歲未聞有封拜太宗介弟優禮絕等果母弟之最幼者薩哈希卜蘇以宗室同封拜九月加古倫烏赫哩貝勒天輔五年薨太祖往弔乘白馬勢額哭之慟及葬復親臨之贈以所御馬薩哈為人敦厚多智長于用人家居純儉好稼穡自始為國相能馴服諸部訟獄得其情當時有言不見國相事何從決及舉兵伐

遼薩哈每以宗臣為內外倚重不以戰多為其功也天會十五年追封燕國王正隆降封陳國公大定三年改贈金源郡王配饗太祖廟廷謚忠毅十五年詔圖像于衍慶宮子宗翰宗憲宗翰別有傳

宗憲本名阿蘭頒行女直字書年十六選入學太宗辛學宗憲與諸生俱謁宗憲進止恂雅太宗召至前令誦所習語音清亮善應對侍臣奏曰此左副元帥宗翰弟也上嗟賞久之兼通契丹漢字未冠從宗翰伐宋汴京

破衆人爭趨府庫取財物宗憲獨載圖書以歸朝廷議
制度禮樂往往因仍遼舊宗憲曰方今奄有遼宋當遠
引前古因時制宜成一代之法何乃近取遼人制度哉
希尹曰而意甚與我合由是器重之達蘭宗雋倡議以
齊地與宋宗憲廷爭折之當時不用其言其後宗弼復
取河南陝西地如宗憲策以捕宗磐宗雋功授昭武大
將軍修國史累官尚書左丞熙宗從容謂之曰嚮以河
南陝西地與宋人卿以為不當與今復取之是猶用卿

言也卿識慮深遠自今以往其盡言無隱宗憲拜謝遂
攝門下侍郎初熙宗以疑似殺左丞相希尹久之察其
無罪深閔惜之謂宗憲曰希尹有大功于國無罪而死
朕將錄用其孫如之何宗憲對曰陛下深念希尹錄用
其孫幸甚若不先明死者無罪生者何由得仕上曰卿
言是也即日復希尹官爵用其孫守道為應奉翰林文
字皇統五年將肆赦議覃恩止及女直人宗憲奏曰莫
非王臣慶幸豈可有間耶遂改其文使均被焉轉行臺

平章政事天德初為中京留守武安軍節度使封河內
郡王改太原尹進封鉅鹿郡王正隆例奪王爵再遷震
武武定軍節度使世宗即位遣使召之詔曰叔若能來
宜速至此若為赫舍哩志寧白彥敬所遏亦不煩叔憂
宗憲聞世宗即位先已棄官來歸與使者遇於中都遂
見上于小遼口除中都留守即遣赴任詔與元帥完顏
古雲同議軍事明年改西京留守八月改南京布薩忠
義自行臺朝京師宗憲攝行臺尚書省事召為太子太

師上謂宗憲曰卿年老舊人更事多矣皇太子年尚少
謹訓導之俄拜平章政事太子太師如故詔以太祖實
錄賜宗憲及平章政事完顏元宜左丞赫舍哩良弼判
祕書監溫王爽各一本伊喇高善努前為寧州刺史以
貪污免世宗以功臣子孫宗族中無顯仕者以為祕書
少監是時母喪未除有司奏其事宗憲曰高善努傲很
貪墨不可致之左右世宗曰朕以其父祖有功爾既為
人如此豈可玷職位哉追還制命因顧右丞蘇保衡參

政石琚曰此朕之過舉不可不改卿等當盡心以輔朕
也有司言諸路明安穆昆怙其世襲多擾民請同流官
以三十月為考詔下尚書省議宗憲乃上議曰昔太祖
皇帝撫定天下誓封功臣襲明安穆昆今若改為遷調
非太祖約臣謂凡明安穆昆當明核善惡進賢退不肖
有不職者其弟姪中更擇賢者代之上從其議進拜右
丞相大定六年薨年五十九上輟朝悼惜者久之命百
官致奠賻銀一千五百兩重綵五十端絹五百匹

希卜蘇本作辭不夫後定為希卜蘇昭祖之孫烏肯徹
之次子也初昭祖久無嗣與威順皇后圖克坦氏禱於
巫而生景祖及烏肯徹烏肯徹長而酺酒屢悖其母昭
祖沒圖克坦氏與景祖謀殺之部人怒欲害景祖圖克
坦氏自以為事而景祖得免希卜蘇健捷能左右射世
祖襲節度肅宗與拒和諾克薩克達戰於烏魯斯哈珠
水再失利世祖至將士無人色世祖使希卜蘇先陣於
托果原而身出搏戰敗其步軍希卜蘇自陣後奮擊之

敗其騎軍所乘馬中九矢不能馳遂步趨而出方戰其
外兄烏格名善射居敵騎中將射希卜蘇熟視識之呼
曰此小兒汝一人事乎何為推鋒居前如此以弓弣繫
馬首而去是役也希卜蘇之功居多和諾克薩克達既
敗希卜蘇馬棄陣中者亦自歸世祖嘗疑珠嘉布勒圖
或與烏春等為變遣希卜蘇單騎往觀布勒圖與呼嚕
置酒樓上以飲之希卜蘇聞其私語昵昵若將執已者
一躍下樓傍出藩籬之外棄馬而歸其勇趨如此博諾

約烏春舉兵世祖至蘇素海甸與烏春遇肅宗前戰色
埒默希卜蘇佐之束縕縱火煙焰蔽天大敗烏春執博
諾以歸太祖獲瑪察獻馘于遼賞功穆宗太祖罕都希
卜蘇皆為詳袞後與阿里罕威泰俱佐薩哈攻埒
克城下之太祖伐遼使領兵千人夾侍左右珠赫店之
役惟希卜蘇之策與太祖合卒破十萬之師挫其軍鋒
遂與太宗薩哈等勸進收國元年七月與太宗薩哈果
同日授為貝勒希卜蘇為愛滿貝勒云天輔七年太宗

與希卜蘇居守鄆王昂違紀律失衆法當死於是遼人以燕京降宋人約歲幣三月世宗生希卜蘇謂太宗曰兄弟骨肉以恩掩義寧屈法以全之今國家迭有大慶可減昂以無死若主上有責言以我為說太宗然之遂杖昂以聞太祖每伐遼輒命希卜蘇與太宗居守雖無方面功而倚任與薩哈比侔矣是歲七月薨會太祖班師道病太宗奉迎謁見恐太祖感慟而病轉甚不敢以薨告太祖輒問曰愛滿貝勒今安在太宗給對曰當即

至矣正隆二年贈開府儀同三司追封曹國公大定三年進封金源郡王配饗太祖廟廷謚曰忠毅子呼沙呼國初有功天會中為真定留守子托卜嘉

宗亨本名托卜嘉性忠謹天輔初以宗室子充護衛掄宗磐宗雋有功加忠勇校尉遷昭信校尉尚廩局直長三年陞本局副使丁父憂時宗正官屬例以材選宗亨在選中起復為烏克遜達宗室將軍改會寧府少尹歷登州刺史改獻州刺史澤州定為特們羣牧使同知北

京路轉運使改澤州定國軍節度使海陵庶人南伐以
本職領武陽軍都總管過淮世宗即位以手詔班賜宗
亨宗亨得詔即入朝大定二年授右宣徽使未幾為西
北路兵馬都統以討契丹賊右副元帥布薩忠義與斡
罕遇于和托宗亨與左翼萬戶富察世傑等以七穆昆
軍與之戰失利及斡罕敗其黨瓜里札巴率衆南奔宗
亨追及之札巴詐稱降宗亨信之札巴詭曰瓜里走願
往邀宗亨不聽乃大縱軍士取賊所棄囊橐人畜多自

有之瓜里札巴亡入于宋坐是降為寧州刺史

宗賢本名色哩希卜蘇之孫也從都統杲取中原襲遼帝于鴛鴦濼宗翰使達蘭襲耶律瑪格都統使普嘉努及色哩等以兵助之普嘉努使色哩舍音費摩呼達達嚕嚕色埒耶律烏舍等各率兵分行招諭獲遼留守迪延家人輜重并降羣牧官穆隆阿得馬甚多使逐水草牧之色哩等趨伊德遂以偏師深入敵邀擊之薩哈戰沒普嘉努至旺國崖西色哩兵會之累官至左副點檢

天眷二年方捕宗雋色哩坐會飲其家奪官爵未幾復
官皇統四年授世襲穆昆轉都點檢封豳國公拜平章
政事進拜右丞相兼中書令進拜太保左丞相監修國
史罷為左副元帥無何復為太保左丞相左副元帥如
故進太師領三省事兼都元帥監修國史出為南京留
守領行臺尚書省事復為左副元帥兼西京留守再為
太保領三省事復為左丞相兼都元帥色哩自護衛未
十年位兼將相常感激思自効以報朝廷雖於悼后為

母黨后專政大臣或因之以取進用色哩未嘗附之皇太子濟安薨魏王道濟死熙宗未有嗣子色哩勸熙宗選後宮以廣繼嗣不少顧忌於后后以此怨之與海陵同在相位未嘗少肯假借海陵雖尊而心憚色哩外以屬尊加禮敬而內常忌之海陵知悼后怨色哩因與后共力排出之色哩亦不以是少變胙王常勝死熙宗納其妻宮中頃之殺悼后及妃數人將以常勝妻為后未果也及海陵弑熙宗詭以熙宗將議立后召諸王大臣

色哩聞召以為信然將入宮謂人曰上必欲立常勝妻為后我當力爭之及被執猶以為熙宗將立常勝妻而先殺之也曰誰能為我言者我死固不足惜獨念主上左右無助爾遂遇害

實圖美漢字一作神徒門扎蘭路完顏部人世為其部長父卓巴納始祖弟博和哩四世孫雖同宗屬不相通問久矣景祖時卓巴納使部人密遜來請復通宗系景祖留密遜歲餘厚其餼廩飲食善遇之及還以幣帛數

筐為贈結其厚意久之扎蘭歲饑景祖與之馬牛為助
糴費使世祖往致之會世祖有疾實圖美日夕不離左
右世祖疾愈辭歸與握手為別約它日無相忘實圖美
體貌魁偉勇敢善戰質直孝友彊記辯捷臨事果斷世
祖襲位交好益深鄰部不悅遂合兵攻之實圖美使弟
阿索美率二百人南下拒敵敵兵千人已出其東據高
泉實圖美將五千人迎擊之敵將阿爾本者勇士也出
挑戰實圖美射中其馬阿爾本反射射中實圖美腹實

圖美拔箭戰愈力阿索美與勇士七人步戰殺阿爾本
諸部兵遂敗實圖美因招諭諸部使附於世祖世祖嘉
之後伐烏春烏木罕及通恩達薩塔等皆以所部從戰
有功弟阿索美尋卒及終喪大會其族太祖率官屬往
焉就以伐遼之議訪之方會祭有飛鳥自東而西太祖
射之矢貫左翼而墜實圖美持至上前稱慶曰鳥爲人
所甚惡今射獲之此吉兆也即以金版獻之後以本部
兵從擊高麗及伐遼功尤多王師攻下西京賜以金牌

其子察遜從行上謂曰吾妃之妹巴克織者在遼俟其
獲當以為汝婦竟如其言上之西征諸將皆從實圖美
乃率善射者三百人來衛京師時太宗居守喜其至親
出迎勞繼聞黃龍府叛與睿宗討平之睿宗賜以奴婢
五百人師還賞賚良渥至是卒年六十一正隆二年封
金源郡王子實實思敬

完顏忠本名都古嚕訥字鄂斯歡實圖美之弟太祖器
重之將伐遼而未決也欲與都古嚕訥計事於是宗翰

宗幹完顏希尹皆從居數日少間太祖與都古嚕訥馮
肩語曰我此來豈徒然也有謀於汝汝為我決之遼名
為大國其實空虛主驕而士怯戰陣無勇可取也吾欲
舉兵仗義而西君以為如何都古嚕訥曰以主公英武
士衆用命遼帝荒于畋獵政令無常易與也太祖然之
明年遂伐遼使博勒和來徵兵都古嚕訥以兵會師收
國元年十二月上禦遼主兵次約囉都古嚕訥與尼楚
赫守達嚕噶路二年與幹魯芬徹會烏楞古討高永昌

破之東京降遂與烏楞古等禦耶律聶呼敗之于蒺藜
山拔顯州乾惠等州降天輔二年與羅索俱入見上曰
遼主近在中京而敢輒來各杖之三十太祖駐軍草濼
都古嚕訥取奉聖州破其兵五千于鷄鳴山奉聖州降
太祖入燕都古嚕訥出德勝口代實圖美為扎蘭路達
貝勒二年以扎蘭地薄斥鹵遷其部於蘇伯水仍以珠
蘇爾之田益之熙宗即位加太子太師十四年加保大
軍節度使同中書門下平章事薨天德二年配饗太祖

廟廷大定二年追封金源郡王

實實康宗時高麗築九城于海蘭旬實實從烏色軍太祖攻寧江州實實摧鋒力戰授明安後從舍音克中京襲遼主于鴛鴦濼畧定山敗夏將李良輔兵與羅索俱獲遼帝于伊都谷宗翰伐宋與尼楚赫圍守太原明年攻襄垣下潞城降西京至汴元帥府以懷孟北阻太行南瀕河控制險要使實實統十二明安軍鎮撫之於是殄平寇盜招集流亡四境以安天會四年薨熙宗時贈

特進大定間諡威敏世宗思太祖太宗創業艱難求當時羣臣勲業最著者圖像于衍慶宮遼王舍音金源郡王薩哈遼王宗幹秦王宗翰宋王宗望梁王宗弼金源郡王希卜蘇金源郡王幹魯金源郡王希尹金源郡王羅索楚王宗雄魯王棟摩金源郡王尼楚赫隋國公阿里罕金源郡王完顏忠豫國公普嘉努金源郡王薩里罕克國公劉彥宗特進烏楞古齊國公韓企先并實實凡二十一人初海陵罷諸路萬戶置蘇伯路節度

使世宗時近臣請改蘇伯為扎蘭節度使不忘舊功上
曰蘇伯扎蘭二水相距千里節度使治蘇伯不必改實
圖美親管明安子孫襲封者可改為扎蘭明安以示不
忘其初

思敬本名薩哈扎蘭河人金源郡王實圖美之子希卜
蘇弟也初名思恭避顯宗諱改焉體貌雄偉美鬚髯純
直有材幹年十一從其父謁見太祖太祖在納琳淀方
獵因詔從獵射黃羊獲之太祖賜以從焉宗翰自太原

伐宋從其兄實實攻太原宗翰取河南思敬從完顏和
尼涉渡河下洛陽圍汴皆有功師還隸遼王宗幹麾下
太宗幸東京溫湯思敬權護衛押衛卒百人從行領穆
昆從征珠格麟有功遂充護衛天眷二年以捕宗磐宗
雋功遷顯武將軍熙宗捕魚混同江網索絕曹國王宗
敏乘醉鞭馬入江手引繫網大繩沉於水中熙宗呼左
右救之倉卒莫有應者思敬躍入水引宗敏出熙宗稱
歎賞賚甚厚擢右衛將軍襲扎蘭路萬戶授世襲穆昆

七年召見賜以襲衣廐馬錢萬貫及歸復遣使賜弓劍
是年入為工部尚書改殿前都點檢無何為吏部尚書
天德初為報諭宋國使宋人以舊例請觀錢塘江潮思
敬不觀曰我國東有巨海而江水有大於錢塘者竟不
往使還拜尚書右丞罷為真定尹用廉封河內郡王徙
封鉅鹿丁母憂起復本官改益都尹正隆二年例奪王
爵改慶陽尹大定二年授西南路招討使封濟國公兼
天德軍節度使俄為北路都統佩金牌及銀牌二西北

路招討使唐古布古岱副之將本路兵二千會布古岱
視地形衝要或于狗灤屯駐伺契丹賊出沒之地置守
禦遠斥候賊至則戰不以晝夜為限詔布古岱曰爾兵
少思敬未至不得先戰布薩忠義敗幹罕於陷泉詔思
敬選新馬三千備追襲幹罕入于奚中思敬為元帥右
都監以舊領軍入奚地漳格宅會大軍討之敗偽節度
特默獲二百餘人賊降將碩和卓與其黨錫勒塔干執
幹罕并其母蘇尼妻子弟姪家屬及金銀牌印詣思敬

降思敬獻俘于京師賜金百兩銀千兩重綵四十端玉帶廐馬名鷹拜右副元帥經畧南邊駐山東罷為西京留守復拜右副元帥仍經畧山東初明安穆昆屯田山東各隨所受地主散處州縣世宗不欲明安穆昆與民戶雜處欲使相聚居之遣戶部郎中完顏讓往元帥府議思敬與山東路總管圖克坦克寧議曰大軍方進伐宋宜以家屬權寓州縣量留軍衆以為備禦俟邊事寧息明安穆昆各使聚居則軍民俱便還奏上從之其後

遂以明安穆昆自為保聚其田土與民田犬牙相入者
互易之三年四月召還京師以為北京留守賜金鞍勒
馬七年召為平章政事先是省併明安穆昆及海陵時
無功授穆昆者皆罷之失職者甚衆思敬請量才用之
上從其請思敬前為真定尹其子取部民女為妾至是
其兄乞離異其妾畏思敬在相位不敢去詔還其家九
年拜樞密使上疏論五事其一女直人可依漢人以文
理選試其二契丹人可分隸女直明安其三鹽漕官可

罷去其四與明安同勾當副千戶官亦可罷其五親王府官屬以文資官擬注教以女直語言文字上皆從之其後女直人試進士瓜爾佳衡尼瑪哈鑑圖克坦鑑完顏匡輩由此致宰相思敬啟之也久之上謂思敬曰朕欲修熙宗實錄卿嘗為侍從必能記其事跡對曰熙宗時內外皆得人風雨時年穀豐盜賊息百姓安此其大概也何必餘事上大悅世宗喜立事故其微諫如此大定十三年薨上輟朝親臨喪哭之慟曰舊臣也賻贈加

厚葬禮悉從官給孫烏呼肯扎塔大定二十四年除明威將軍授蘇伯路寶鄰山明安

贊曰和卓讓國世祖以開帝業薩哈治國家定社稷尊立太祖深謀遠畧為一代宗臣賢矣哉希卜蘇蓋前人之愆著勲五世易曰有子考無咎其此之謂乎始祖與季弟異部而處子孫俱為強宗而取遼之策卒定于都古嚕訥豈天道陰有以相之邪

金史卷七十